




ԱՄԱՆՈՐԸ ՀՈԳԵՎՈՐ ԺԵՄԱՐԱՆՈՒՄ

1967 թվականի դեկտեմբերի 31—օրը կիրակի և գիշեր՝ կաղանդի:

Ժամը 20-ին հոգևոր ճեմարանի հանդիսությանը սրահում, Ամանորի ավանդական սեղանների շուրջ համախմբվել էին Մայր Աթոռի միաբանությունը, Գերագույն հոգևոր խորհրդի և Վերստուգիչ հանձնաժողովի անդամները, «Էջմիածին» ամսագրի խմբագրական մարմնի անդամները, հոգևոր ճեմարանի դասախոսական կազմն ու ուսանողությունը, վանքի պաշտոնեությունը և այլ հրավիրյալներ՝ իրենց պարտքը կատարած մարդկանց արդար խղճմտանքով ու գոհունակությամբ, ինչպես նաև արտագին երախտագիտությամբ լցված դեպի համագգային այն սուրբ հաստատությունն ու ուխտատեղին, որ համայն հայության Մայր Աթոռ սուրբ Էջմիածինն է, և դեպի նրա արժանընտիր գահակալը, որն իր սուրբ և բարի ձեռքերում է պահում Հայաստանյայց առաքելական եկեղեցու գերագույն հեղինակության ու ղեկավարության գայիսունը:

Ամանորի առթիվ կազմակերպված սույն հանդիսությանը ներկա էին նաև ուխտավորաբար Մայր Աթոռում և մայր հայրենիքում գտնվող հյուրեր, Վիեննայի հայոց հոգևոր հովիվ և Ժնևի Եկեղեցիների համաշխարհային խորհրդի մոտ Մայր Աթոռի մշտական ներկայացուցիչ հոգ. տ. Մեսրոպ Ծ. վրդ. Գրիգորյանը, հոգ. տ. Ծնորհք վրդ. Գասպարյանը՝ Հարավային Ամերիկայից, Հովհաննես Տեր-Հովհաննիսյանը, տեր և տի-

կին Ժիրայր-Մարիամ Ահարոնյանները՝ ԱՄՆ-ից, Ուստր քաղաքից:

Ժամը 8-ին ժամանում է Վեհափառ Հայրապետը և ընդհանուր ոգևորության մեջ օրհնում Մայր Աթոռի բարիքներով զարդարված ամանորական սեղանը:

Սեղանների շուրջ ստեղծվում է նոր տարվա հատուկ խոհերով, մտորումներով, հույսերով և երազներով օծուն, խորհրդավոր, մտերիմ, ընտանեկան մթնոլորտ:

Հանդիսության սկզբում հոտնկայա ունկընդրվում է «Հայր մեր»-ը և Հայկական ՍՍՀ պետական հիմնի նվագը:

Ամանորին նվիրված երեկույթը բանալով, հոգևոր ճեմարանի տեսուչ հոգ. տ. Ներսես Ծ. վրդ. Պողապայաանը նշում է, որ ինչքան քաղցր ու արտառուչ է պահը, որ հոգևոր ճեմարանի հյուրընկալ կամարների ներքո, Մայր Աթոռ ու Էջմիածնի լույսին ու խորհրդին նվիրված ծառայողները, հոգևորական թե աշխարհական, պաշտոնյա թե ուսանող, հավաքված ամանորի սեղանի շուրջ, երախտագիտությամբ և գոհունակությամբ հրաժեշտ ենք տալիս անցնող տարվան և նոր հույզերով ու բարեմաղթություններով դիմավորում նորը՝ 1968 թվականը:

Այնուհետև տեսուչ հայր սուրբը, արտահայտելով բոլոր ներկաների խոհերն ու երախտագետ զգացմունքները, առաջարկում է առաջին բաժակը Մայր Աթոռ ու Էջմիածնի անասանության, պայծառության և հավերժության և նրա արժանավոր գահակալ,

Ն. Ս. Օծություն S. S. Վազգեն Ա. Ամենայն Հայոց կաթողիկոսի թանկագին կենաց արևշատության, Նրա հետագա եկեղեցաշեն, հայրենամկեր գործերի հաջողության համար:

Բոլոր ներկաները հոտնկայա բաժակ են բարձրացնում ուրախ ծափերի հնչյունների տակ, մինչ ճեմարանի երգչախումբը հնչեցնում է վեհ ու հանդիսավոր Մայր Աթոռի հիմնը՝ «Էջմիածինն է հորե» շարականը:

Իր աթոռից բարձրանում է Վեհափառ Հայրապետը, ուրախ ու բարձր տրամադրության ներքո, նոր տարվա խոհերով, մտորումներով համակված, իր պատգամն ու օրհնությունը տալու, շնչոտելով, որ ինչպես իր գահակալության անցնող տասներկու տարիների ընթացքում, 1968 թվականին և այնուհետև էլ, իր ղեկավարության ներքո Մայր Աթոռ ս. Էջմիածինը իր աստվածատուր ու հավերժական առաքելությունը կրկատարի հայ եկեղեցու ծոցում թե՛ մայր հայրենիքի և թե՛ ափսոսքի հայության համար, հայ եկեղեցի, հայ ժողովուրդ և վերածնված մայր հայրենիք երեք նվիրական սրբությունների և վեհ զգացմունքների լույսին ու ներշնչումների ներքո:

Ն. Ս. Օծությունը խրատական խոսքեր ուղղելուց հետո ուսանողության, իր ոգևորիչ պատգամի վերջում սրտագին բարեմաղթություններ է անում հայ եկեղեցու պաշտոնության, մայր հայրենիքի և բովանդակ հայ ժողովրդի բարօրության համար, որ 1968 թվականը լինի արդարև եկեղեցաշեն, հայրենամկեր աշխատանքների խոստմնալից տարի, նոր հեռանկարներով խանդավառ:

Վեհափառ Հայրապետի պատգամով ստեղծված խանդավառությունը ավելացնում են հոգևոր ճեմարանի սաները իրենց երգերով, արտասանություններով:

Ճեմարանի երգչախումբը, երաժշտության դասատու Խորեն Մելիսանջյանի ղեկավարությամբ, ոգևորությամբ կատարում է «Խընջույքի երգ», «Գարուն Երևան», «Հայոց գինին», «Այ ֆոռկա, ֆոռկա», «Կաղանդի երգ», «Խմենք, ընկերներ» խմբերգերը:

Բարեշնորհ Եղիշե սարկավագ հաղթանակը արտասանում է Եղիշե Չարենցի «Ես իմ անուշ Հայաստանի», Բ լսարանի ուսանող Հովհաննես արկվ. Գրվրգյանը՝ Սիմեոն Երեվանցի կաթողիկոսի «Յաարտ տարոյ» բանաստեղծությունները:

Գ լսարանի ուսանող Վրեժ արկվ. Ներսիսյանը ընթերցում է հետևյալ «Ուղերձ ամանորական»-ը՝ ուղղված Վեհափառ Հայրապետին, ի դիմաց հոգևոր ճեմարանի ուսանողության:

«Վեհափառ Տեր,

Նոր տարվա ու նոր կյանքի արշալույսի այս խորհրդավոր պահին մենք՝ հոգևոր ճե-

մարանի ուսանողներս, սրտագին ողջունում ենք գալուստը նոր տարվա, միաժամանակ մի հետադարձ հայացք գցելով մեզմիջ հեռացած ու անվերադարձորեն հավերժի գիրկը սուզվող հին տարվա վրա:

Քիչ հետո 1967 տարին պլայացող ճրագի նման պիտի մարի, և նրան պիտի հաջորդի նորը՝ լուսաշող աստղի նման, լուսավորելով նաև մեր ճանապարհը:

Անսկիզբ ու անվախճան ժամանակը մի շրջան ևս բոլորեց: Հին տարվա մայրամուտին և Ամանորի արշալույսին մարդկությունը մերթ թախծով, մերթ խինդով մտածում է գալիք օրերի մասին, նայում է անվերադարձ անցած ժամանակին, որն իր հետ հավերժի գիրկն է տանում մարդկանցից շատերի ցավերն ու վշտերը, երազներն ու իղձերը, երջանկությունն ու քախտավորությունը, հաճախ նաև, ավա՜ղ, չպատկված գեղեցիկ ու բարի անկախությունները:

Ժամանակը հավիտենական է ու անփոփոխ: Հավիտենականության խորհուրդն է մարդ գգում ժամանակի մեջ: Մարդկային կյանքի իրադարձություններն են, որ փոխվում են ու անցնում, մինչ ժամանակը մնում է անսկիզբ ու անվախճան:

Սակայն մարդու պարտքն է՝ ժամանակը լցնել ազնիվ գործերով և գեթ տարին մեկ անգամ, նոր տարվա առթիվ, հանրագումարի բերել իր աշխատանքի պտուղները, ձեռք բերած հաջողությունները և կրած հուսախաբությունները: Իզուր չանցավ 1967 թվականը հոգևոր ճեմարանի կամարների տակ: Մենք շնորհակալությամբ ենք բաժանվում նրանից, որովհետև Աստուծու օգնականությամբ, Ջերդ Սուրբ Օծության օրհնությամբ և ամենօրյա ղեկավարության ներքո, դասախոսների և մեր աշխատանքով կարողացանք լցնել բարի արդյունքներով 1967 թվի կյանքի մատյանը և իմաստավորել մեր օրերը այս սուրբ հարկի տակ, մի քայլ ևս մոտենալով այն սուրբ նպատակին, որը բերել է մեզ՝ ուսանողներին կրթական այս հաստատության ծոցը մայր հայրենիքից և ափսոսքի զանազան թեմերից, որպեսզի պատրաստվենք մեր սուրբ եկեղեցու ծառայության վաղվա մեծ գործի համար:

Հոգևոր ճեմարանի սաներս մեր հոգու խորունկ ծալքերից, անհուն սիրով և երախտագիտությամբ մեր սրտագին բարեմաղթություններն ենք բերում Ջեզ, Վեհափառ Տեր, ցանկանալով Ջերդ Սրբության երկար կյանք, արևշատություն և մշտադադար անողություն՝ հետագա Ջեր եկեղեցաշեն ու հայրենամկեր գործունեության համար:

Թույլ տվեք, Վեհափառ Տեր, հանուն հոգևոր ճեմարանի Ջեր հոգևոր զավակների, որդիական ամենաանկեղծ շնորհակալություն և երախտագիտություն հայտնել Ջեր

ամենօրյա հայրական հոգածության համար, որով շրջապատել էք հոգևոր ճեմարանը և շնորհավորել Ձեր Ամանորը:

Ծնորհավոր նոր տարի, սիրելի Վեհափառ Հայր»:

Հանդիսության ընթացքում ուսանողության ուղիւն և նոր տարվա խոհերով համակված, հուզիչ, ջերմ ելույթներ են ունենում Վիեննայի հայոց հոգևոր հովիվ հոգ. տ. Մերուպ ծ. վրդ. Գրիգորյանը, «Էջմիածին» ամսագրի խմբագիր Արթուր Հատիսյանը:

Ընդհանուր խանդավառության և ուրախության մեջ տեսուչ հոգ. տ. Ներսես ծ. վարդապետը սրամիտ ու դիպուկ «կաղանկներ» է բաժանում միաբանության անդամներին, հոգևոր ճեմարանի դասախոսներին և ուսանողության՝ հաջող ու համեղ բնութագրումներով:

Մի պահ հանգչում են դահլիճի լույսերը: Մոմերի դժգույն ու պլպլացող լույսերի տակ Բ լսարանի ուսանողներ Հակոբ և Հովհաննես սարկավագները, նույն լսարանի Արարատ սարկավագի դաշնամուրի ընկերակցությամբ, ապրումով, մեղմորեն ու վեհ կատարում են «Խորհուրդ մեծ» շարականը, «Սուրբ գիշեր» տաղը, «Հրեշտակների երգ»-ը, Փրկչի աստվածահայտնության և ծննդյան մեծ խորհուրդի բերկրանքը բաշխելով բոլոր ներկաներին:

Մայր Աթոռի հովանու ներքո, հոգևոր ճեմարանի կամարների տակ, Հայոց Հայրապետի օրհնաքեր ներկայությամբ, Ամանորի ուրախ սեղանների շուրջ բոլորված, ժամանակն անցնում էր արագ, բայց բովանդակալից և տպավորիչ:

Հայոց Հայրապետի օրհնությամբ և աղոթքով ավարտվում է օրվա հանդիսությունը:

Իր օրհնության մեջ Վեհափառ Հայրապետը խաղաղություն է բարեմաղթում ողջ աշխարհին, բարգավաճում՝ հայոց երկրին ու ժողովրդին, և օրհնելով միաբանությանը, ուսանողությանը և պաշտոնեությանը, թելադրում է նույն նվիրումով ու հավատքով աշխատել՝ գլուխ քերելու համար Մայր Աթոռ ս. Էջմիածնի առաջ կանգնած եկեղեցաշեն ու հայրենանվեր գործերը՝ ի մխիթարություն բովանդակ հայ ժողովրդի:

Հայոց Հայրապետը իր եռանդով, իր պայծառ լավատեսությամբ ու անկոտրում հավատքով մի անգամ ևս խանդավառեց բոլորին, Մայր Աթոռի ապագա հոգևոր, եկեղեցական, ազգային ու հայրենասիրական առաքելության նկատմամբ:

Գիշերվա ժամը 23-ին, խմբովին երգված «Հայր մեր»-ով ավարտվում է նոր տարվան նվիրված հանդիսությունը հոգևոր ճեմարանի հարկի տակ:

Ծնորհավոր նոր տարի:

